

ՄԵԾ ՀԱՅԲԻ ՀՅՈՒՍԻՍ-ԱՐԵՎՄՏՅԱՆ ԵՎ ՀՅՈՒՍԻՍԱՅԻՆ
ՀԱՐԵՎԱՆՆԵՐԸ ՀԱՅ-ՀՌՈՄՆԱԿԱՆ ՓՈԽՀԱՐԱՔԵՐՈՒԹՅՈՒՆՆԵՐԻ
ՈՒՈՐՏՈՒՄ (I դ. երրորդ քառորդ)

ՍԱՐԳԻՍ ՊԵՏՐՈՍՅԱՆ

Մ. թ. 54 թ. Հայաստանում տեղի ունեցած դեպքերը՝ հայ ապստամբների կողմից հայկական գահի հափշտակիչ Հռոմի դեմ ղեկավարված պարթևական զորքերի մոտ շրջապատում հայաստանի և Տրդատ Արշակունու (54—80 թթ., օրինական ճանաչված 66 թ.) գահակալումը, զորոյի էին հավասարեցրել Հայաստանի նկատմամբ Հռոմի ունեցած հավակնությունները։ Դա նշանակում էր ոչ միայն Հայաստանի ընդգրկումը հակառակորդ պետության՝ պարթևական Իրանի, քաղաքականության ոլորտը, այլև նախադրյալներ էին ստեղծվում դեռևս Արտավան Գ-ի (12—38 թթ.) ժամանակ առաջ քաշված «Արշակունի-ն»-ը Արքեմենյանների ժառանգորդներն են»¹ աշխարհակալական ծրագրի իրագործման համար։ Ահա թե ինչու այդ նույն թվականին Հռոմում գահ բարձրացած Ներոնը (54—68 թթ.) գործի էր դրել հռոմեական հետախուզական, դիվանագիտական և ռազմական ապարատները՝ կայսրության դիրքերն Արևելքում կայունացնելու և պարթևներին Հայաստանից մտարելու համար։

Պարթևներին Հայաստանից հեռացնելու և հայկական հարցը մեղմելու ձեռքերի ազատություն ստանալու նպատակով հռոմեացիները Վաղարշ Ա-ի (51—75 թթ.) դեմ որպես Արշակունիների իրանական գահի հավակնորդ դուրս էին բերել Պարթևական Իրանի նախկին թագավոր Վարդանի որդուն²։ Հազիվ հազ շաշիվները սրա հետ փակած՝ Վաղարշը ստիպված էր եղել իր ուշադրությունը բեռնելու Իրանի հյուսիս-արևելքի վրա։ Այստեղ՝ Վրկանում, հուժկու ապստամբություն էր բռնկվել Արշակունիների կենտրոնական իշխանության դեմ։

Հայկական հարցի վերջնական լուծմանը կոչված իր ծրագրի իրագործումը Ներոնը սկսել էր Մեծ Հայքին սահմանակից երկրներում հակապարթևական և հակահայկական տարրն ուժեղացնելով։ Փոքր Հայքում գահընկեց էր արվել Կոտիսը և նրա փոխարեն գահ էր բարձրացվել Արիստոբոլոսը, Մեծ Հայքից անջատված Ծոփքում թագավոր էր նշանակվել Սահմոսը, Պոնտոսի թագավոր Պոլեմոն Բ-ին, Կոմմագենի Անտիոքոս Դ և Քադկիդիկի (Խալկիդիկի) Ագրիպա արքաներին կարգադրվել էր մարտական միճակում պահել իրենց զորքերը՝ հարկ եղած դեպքում դաշնակից հռոմեացիներին միանալու

¹ Հմմտ. Тац., Ann., VI, 31.

² Նույն տեղում, XIII, 7: Վաղարշ Ա-ի այս հակառակորդը ոչ թե նրա «Վարդան որդին» էր (fillius Vardanes), այլ «Վարդանի որդին» (fillius Vardantis)։ Այս առթիվ տե՛ս Հ. Մանանդյան, Քննական տեսություն հայ ժողովրդի պատմության, հ. Ա, Երևան, 1944, էջ 328, ծան. 1 (տե՛ս նաև «Հայ ժողովրդի պատմություն», հ. I, Երևան, 1971, էջ 735)։

³ О. В. Кудрявцев, Восточная политика Римской империи в начале правления Нерона («Вестник древней истории», 1948, № 2, էջ 85)։

համար⁴։ Կապաղովկիայի կուսակալ, լեգատ և Արևելքի հռոմեական զինված ուժերի գլխավոր հրամանատար էր նշանակվել խոշոր զորավար և քաղաքական գործիչ Գնեյուս Դոմիտիոս Կորբուլոնը⁵։

Հռոմի ձեռնարկած այս նախապատրաստությունների առթիվ ուշադրության արժանի վկայություններ կան պահպանված ոչ միայն Տակիտոսի, այլև Մովսես Խորենացու հաղորդումներում։ Ճիշտ է, Խորենացու «Հայոց պատմության» մեջ Արշակունի արքայատոհմի հայկական ճյուղի իրական հիմնադիր Տրդատ Ա-ի փոխարեն հանդես է գալիս ավանդական հիմնադիր Վաղարշակը, հռոմեացիների փոխարեն նրա հակառակորդները մակեդոնացիներն են. բայց հայտնի է, որ Վաղարշակի կերպարում պահպանված են հիմնականում Տրդատ Ա-ի գծերը, իսկ «մակեդոնացիների» դեկավար Մորիյուզիկը հռոմեական զորավար Կորբուլոնն ինքն է⁶։ Վաղարշակի կողմից Արմավիրում անցկացված զորահավաքի նկարագրումից հետո Խորենացին շարունակում է. «Եւ աստի միաբանեալ զբոլոր կողմանս աշխարհիս՝ հասանէ առ սահմանաւք Խաղտեաց։ Քանզի Ղաղիկայ, Պոնտոս, Փոնգիայ, Մաթաք եւ այլք, ոչ գիտելով զհամբաւ պատերազմին Արշակայ՝ առ Մակեդոնացուց պետութիւնն զմիաբանութիւն դաշանցն հաստատուն պահէին։ Վասն որոյ ոմն Մորիիւզիկեայ միաբանեալ զասացեալ կողմանս դասոսիկ, եւ գրգռի ի պատերազմ ընդ Վաղարշակայ»⁷։

Փոքր Հայքից Սատաղ-Արտաշատ ճանապարհով Կորբուլոնի բանակը ներխուժելով Մեծ Հայք, 57—58 թթ. ձմեռը անց էր կացրել Կարնո դաշտում⁸, իսկ գարունը բացվելուն պես՝ վերսկսել ուղղմական գործողությունները։ Այդ նույն ժամանակ արևմուտքից և հյուսիսից Մեծ Հայք էին ներխուժել հարևան կրկրների Հռոմի դաշնակից Թագավորների զորքերը և նրանց ենթակա ցեղերը⁹։ Մեծ Հայք ներխուժելիս ընտրելով Սատաղ-Արտաշատ ուղղությունը, Կորբուլոնը հաշվի էր առել իր բանակը սեփական նավահանգիստներից (հատկապես Տրապիզոնից) եկող անհրաժեշտ պարենով ապահովելու հանգամանքը։ Իսկ Տրդատը, որը ստիպված էր եղել նրա դեմ դուրս գալու գլխավորապես հայկական ուժերով (պարթևական զորքերի հիմնական մասը Վաղարշ Ա-ի գլխավորությամբ կաշկանդված էր Վրկանում), խուսափել էր ճակատամարտից, ջանալով մանր կռիվների միջոցով ջլատել թշնամու ուժերը, նրան զրկել անխափան կերպով պարեն ու անասնակեր ստանալու հնարավորությունից¹⁰։

Այս առթիվ հետաքրքիր է Տակիտոսի հետևյալ վկայությունը. «Արդ, Կորբուլոնը երկար ժամանակ և ապարդյուն աշխատելով նրան (Տրդատին—Ս. Պ.) ճակատամարտ տալ՝ ստիպված էր [այնուհետև] թշնամու օրինակով մասնատել ուղղմական գործողությունները։ Նա իր ուժերը բաշխեց լեգատների և պրեֆեկտների միջև, որպեսզի նրանք միաժամանակ ներխուժեն Հայաստանի

⁴ Tac., Ann., XIII, 7 (տե՛ս նաև «Հայ ժողովրդի պատմություն», հ. I, էջ 735)։

⁵ Tac., Ann., XIII, 8.

⁶ Н. Адонц, Армения в эпоху Юстиниана, Ереван, 1971, էջ 432.

⁷ «Մովսեսի Խորենացու պատմություն հայոց», Տփղիս, 1913, էջ 106.

⁸ Tac., Ann., XIII, 35 (տե՛ս նաև Հ. Մանանդյան, Քննական տեսություն հայ ժողովրդի պատմության, հ. Ա, էջ 328)։

⁹ Tac., Ann., XIII, 7, XIII, 37 (տե՛ս նաև «Հայ ժողովրդի պատմություն», հ. I, էջ 737)։

¹⁰ Tac., Ann., XIII, 39.

զանազան վայրերը՝ նա համոզից նույնպես Անտիոքոս թագավորին՝ հարձակվել իրեն ամենամոտ շրջանների վրա։ Իսկ Փարսմանը, իբր թե դավաճանության համար սպանելով իր որդի Հռադամիզդին, ջանում էր ցույց տալ իր հավատարմությունը մեր նկատմամբ՝ սկսեց ավելի համարձակ գործել հայերի դեմ, որոնց նկատմամբ նա տածում էր հին ատելություն։ Եվ այդ ժամանակ առաջին անգամ մեր կողմը գրավվեցին մոսխերը, այս ցեղն այժմ էլ ուրիշներից ավելի հավատարիմ է հռոմեացիներին, որոնք հարձակվեցին Հայաստանի հեռավոր դժվարամատույց վայրերի վրա¹¹։

Ինչպես պարզվում է բերված հատվածից, Կորբուլոնը Մեծ Հայքին հյուսիսից հարևան իր դաշնակիցներին նախապես պատվիրել էր հարձակվելու Տայքի, Խորձենեի («Աշխարհացոյց»-ի արևմտյան Գուգարքը) և բուն Գուգարքի («Աշխարհացոյց»-ի արևելյան Գուգարքը) վրա, որոնցով էին անցնում պոնտական և կողքիսյան նավահանգիստներից հայոց միջնաշխարհ տանող ճանապարհները։ Սա Կորբուլոնին հնարավորություն էր տվել հիշյալ ճանապարհների հսկողության համար լեռներն ուղարկել հռոմեական առանձին ջոկատներ, իսկ հռոմեական ու դաշնակից բանակների հիմնական մասը տանել Այրարատ։ Հռոմի աչքս դաշնակիցների կողմից իրենց ստացած հանձնարարությունների իրագործման շնորհիվ էր, որ ի դերև էին ելել հռոմեական ու դաշնակից բանակների մատակարարման գործը խափանելու ուղղությամբ Տրդատի գործադրած ջանքերը¹²։

Տակիտոսի վերոբերյալ հաղորդումը միևնույն ժամանակ ցույց է տալիս, որ վրաց Փարսման Ա թագավորի և մոսխերի հետ միասին հիշատակված Անտիոքոս թագավորը չէր կարող լինել Կոմմագենեի Անտիոքոս Դ արքան։ Հավանաբար, սա եղել է հենիոխների և մաքելոնների թագավորը, որի երկիրը գտնվում էր Պոնտոսից արևելք, հայկական Սպեր և Տայք շրջանների, Մոսխերի երկրի (հետագա Սամցխե և Աճարա գավառները) և Սև ծովի միջև¹³։ Այս դեպքում պետք է ենթադրել, որ հենց հենիոխ-մաքելոնական հրոսակախմբերի ներխուժմանն էր ենթարկված եղել սահմանակից Տայքը, երբ, հավանաբար, վերջինիս հարևան Խորձենե («Աշխարհացոյց»-ի արևմտյան Գուգարքը) դարձել էր մոսխերի, իսկ Գուգարքը («Աշխարհացոյց»-ի արևելյան Գուգարքը)¹⁴ Փարսման Ա-ի զորքերի ասպատակությունների թատերաբեմ։

Տրդատ Ա-ին Հայաստանից վտարելուց հետո (60 թ.), դեպքերին իրազեկ Տակիտոսի վկայությամբ. «Հրի ու սրի մատնելով նրանց բոլորի տիրույթները, որոնց մեր դեմ տածած թշնամանքին տեղյակ էր, Կորբուլոնն արդեն իր ձեռքն էր առել ամբողջ Հայաստանը, երբ ժամանեց Տիգրանը՝ ներոնի կողմից

¹¹ Նույն տեղում, 37։

¹² Նույն տեղում, 39։

¹³ Տե՛ս «Հայաստանը մ. թ. ա. 66—մ. թ. 222 թվականներին» քարտեղը («Հայ ժողովրդի պատմություն», հ. I)։

¹⁴ «Աշխարհացոյց»-ի Գուգարքի տարածքում ավելի վաղ երկու առանձին վարչական միավորների՝ Խորձենե (արևմուտքում) և Գուգարենե (արևելքում), գոյության վերաբերյալ տե՛ս Strabo, XI, 4, 5, XI, 14, 4, XI, 14, 5 (տե՛ս նաև Я. А. Манандян, Маршруты понтийского похода Помпея и путь отступления Митридата в Колхиду («Вестник древней истории», 1940, № 3—4, էջ 98—99), Բ. Հարությունյան, Մեծ Հայքի Գուգարք աշխարհը ըստ «Աշխարհացոյց»-ի («Բանբեր Երևանի համալսարանի», 1977, № 2, էջ 176—197), «Արտաշեսյանների թագավորությունը մ. թ. ա. I դ. քարտեղը («Հայկական սովետական հանրագիտարան», հ. 2, Երևան, 1976)։

ընտրված նրա իշխողը»¹⁵, Տիգրան Զ-ի (60—61 թթ.) «գահակալումը նշանակում էր Հռոմի նոր, բայց կարճատև հաջողությունը: Դրա ժամանակավոր լինելը գիտակցում էին նաև Հռոմում: Ուստի, պարթևա-հայկական կողմի ապագա ուժեղացման դեպքում Հայաստանի պաշտպանությունը անդամալուծելու և հարևան երկրների, կախյալ թագավորների ու ցեղերի հետագա աջակցությունն ապահովելու նպատակով Հռոմը նրանց էր վստահել հայկական սահմանամերձ շրջանների կառավարումը՝ փաստորեն ճանաչելով դրանց անջատումը Մեծ Հայքից:

Հռոմեական նոր դրածոյի մուտքը Հայաստան նկարագրելուց հետո Տակիտոսն ավելացնում է. «Տիգրանին տրվեց հազար լեգեոնականներից, դաշնակից երկու կոհորտներից և օժանդակ հեծելազորի երկու ջոկատներից բաղկացած մի պահակախումբ: Եվ որպեսզի նրա համար ավելի հեշտ լինի նոր գահը պահպանել, Հայաստանի առանձին մասերը՝ նայած թե ում հողերին էին դրանք հարում, կարգադրություն ստացան հնազանդվել Փարսմանին, Պողեմոնին, Արիստոբուլոսին և Անտիոքոսին»¹⁶,

Հարկավ, բանը Տիգրան Զ-ի կառավարումը հեշտացնելը չէր: Դա պատրվակ էր միայն: Խնդրո առարկա շրջանները, որոնք Մեծ Հայքի հյուսիս-արևմտյան և հյուսիսային ծայրամասերն էին, հայկական պետության կազմից դուրս մնալով՝ դրանով իսկ նրան զրկում էին Պոնտական, Պարսարյան, Խորձենական և Գուգարաց լեռներում ունեցած պաշտպանական բնագծերից: Դրանց անցումը Հռոմի դաշնակիցներին ու վասալներին՝ կայսրությանը հնարավորություն էր ընձեռում անհրաժեշտության դեպքում հյուսիսից ևս ուժեղացնելու ճնշումը Մեծ Հայքի գահակալների վրա թե՛ սրանց, թե՛ «հյուսիսականների» (Հյուսիսային Կովկասի սարմատական և լեռնցի ցեղերի) միջոցով: Միևնույն ժամանակ Մեծ Հայքի տարածքը կրճատելու իր քաղաքականությունը Հռոմը ձգտում էր այն վերածել այնպիսի երկրորդական կարգի վասալ թագավորության, ինչպիսիք էին Կոմմագենեն, Մոփքը, Փոքր Հայքը և նրանց մյուս հարևանները, որոնց գահակալները խաղալիք էին Հռոմի ձեռքին¹⁷:

Մեծ Հայքի նկատմամբ Հռոմի որգեգրած այս քաղաքականությունը սկսել էր կիրառվել տասնամյակներ առաջ: Այսպես, օրինակ, Մեծ Հայքի կաղմից դեռևս մ. թ. սկզբին դուրս էր մնացել և Հռոմի դաշնակից աղվանների տիրապետության տակ էր անցել Կասպքը (Կասպիանա)¹⁸, Հռոմեա-պարթևական թ7 թ. պայմանագրով Մեծ Հայքից անջատվել էին՝ հարավում Միջագետքի հայկական հատվածը (որն անցել էր Ադիաբենեի թագավորությանը), իսկ հյուսիսում՝ Գողթնական կուսակալությունը (այն դրվել էր Վիրքի թագավորների ենթակայության տակ)¹⁹, 55 թ. դրանց ավելացել էր Մոփքը, որտեղ ստեղծվել էր Հռոմից կախյալ հայկական առանձին թագավորություն²⁰:

¹⁵ Tac., Ann., XIV, 26.

¹⁶ Նույն տեղում:

¹⁷ «Հայ ժողովրդի պատմություն», հ. I, էջ 741:

¹⁸ Հմմտ. Strabo, XI, 14, 5 և XI, 4, 5:

¹⁹ «Հայ ժողովրդի պատմություն», հ. I, էջ 720:

²⁰ Tac., Ann., XIII, 7.

Այժմ՝ 60 թ., դրանց շարքն էին մտնում Մեծ Հայքի հյուսիսային և հյուսիս-արևմտյան ծայրամասերը՝ Գուգարքը, Խորձենեն, Տայքը, Սպերը և Ակի-իսենեն²¹ (Եկեղեցի գավառն հարևան շրջանների հետ միասին)²²։ Հայկական այս ծայրամասերը հարում էին բուն Վիրքին, Մոսխերի երկրին, «Հենիոխների և մաքելոնների թագավորությանը», Պոնտոսին և Փոքր Հայքին։ Դրանցից Վիրքի Փարսման Ա թագավորն ստացել էր բուն Գուգարքը, նրան ենթակա մոսխերը՝ Խորձենեն, Պոնտոսի Պողեմոն Բ-ն՝ Սպերը, իսկ Փոքր Հայքի Արիս-տորուկոս արքան՝ Ակիլիսենեն։ Տակիտոսը նշում է, որ անջատված հայկական ծայրամասերից իր բաժինն էր ստացել նաև Անտիոքոսը։ Եթե հանձին այս վերջինի Տակիտոսը նկատի ուներ Կոմմագենեի արքա Անտիոքոս Դ-ին, ապա, ինչպես իրավամբ ենթադրում է Ս. Երեմյանը, Տակիտոսի հաղորդած այս տեղեկությունը, թերևս, ճիշտ չէ, «...որովհետև այդ թագավորության (Կոմմագենեի—Ս. Պ.) տերիտորիան 37 թ. հետո, երբ Հայոց Միշագետքը անցավ պարթևներին ենթակա Ագիարենեի թագավորությանը, ընդհանուր սահման չունեն Մեծ Հայքի հետ, մանավանդ, որ այժմ, բացի դրանից, գոյություն ուներ Ծոփաց թագավորությունը, որն ընկած էր Կոմմագենեի և Մեծ Հայքի միջև»²³։

Հնարավոր է, սակայն, որ այս դեպքում ևս խոսքը վերաբերում է հենիոխների և մաքելոնների վերահիշյալ թագավորին։ 57—58 թթ., ինչպես տեսանք, երբ Կորբուլոնը հռոմեական և դաշնակից բանակներով Սատաղից շարժվում էր դեպի Հայաստանի խորքերը, հենիոխների ու մաքելոնների հրոսակախմբերը մոսխերի և Փարսմանի զխավորած վրացական զորքերի հետ միասին ներխուժել էին Մեծ Հայքի հյուսիսային սահմանամերձ շրջանները՝ Տայք, Խորձենեն և Գուգարք։ Ըստ այսմ, հենիոխների ու մաքելոնների թագավոր Անտիոքոսը պետք է բաժին ստացած լիներ իր թագավորությանը հարևան Տայքը, որն ընկած էր Փարսմանի և նրան ենթակա մոսխերի ստացած Գուգարք-Խորձենեն շրջանների (հյուսիս-արևելքից) և պոնտական թագավոր Պողեմոն Բ-ի ստացած Սպերի (արևմուտքից) միջև։ Դեպքերի հետագա ընթացքից էլ է երևում, որ մինչև 64 թ. Տայքն անջատված է եղել Մեծ Հայքից և հյուսիսային ու հյուսիս-արևմտյան մյուս շրջանների նման վերանվաճվել ու Հայաստանի գիրկն էր վերադարձվել Տրդատ Ա-ի (ավանդական Վաղարշակի) կողմից²⁴։

Տրդատի արտաքսումը և նրա փոխարեն Մեծ Հայքում հռոմեական դրոշմ Տիրգրան Զ-ի գահակալումը, ինչպես պարթևական վերնախավի, այնպես էլ հայ ավագանու մեծամասնության մեջ ընդհանուր դժգոհություն էին հարուցել Վաղարշ Ա-ի վարած քաղաքականությունից։ Ի վերջո, նրանց ճնշման տակ, Վաղարշը հաշտվել էր ապստամբ վրկանցիների հետ և օժանդակ ուժեր ստանալով այնտեղից, դարձել էր արևմուտք՝ վերսկսելով պատերազմը Հռոմի դեմ²⁵։

Մովսես Խորենացու օգտագործած աղբյուրների համաձայն, Վաղարշ Ա-ն (Արշակ Մեծ) մտադիր է եղել Արշակունիների ապագա աշխարհակալության

²¹ «Հայ ժողովրդի պատմություն», հ. I, էջ 741—742։

²² «Այդ սահմաններում Ակիլիսենեն ներկայացնում էր բավականին ընդարձակ մի երկիր՝ ներառելով այն ամբողջ տարածքը, որն հետագայում բռնում էին Եկեղիքը, Դարանադին, Մանադին (Մանանադին—Ս. Պ.), Աղյունը և Մուզուրը» (Н. Адоиц, *նշվ. աշխ.*, էջ 55)։

²³ «Հայ ժողովրդի պատմություն», հ. I, էջ 742։

²⁴ Մ. Խորենացի, էջ 108։

²⁵ Tac., Ann., XV, 2.

արևմտյան կեսը միավորելու իր եղբայր Տրդատ Ա-ի (Վաղարշակ) գերագույն իշխանության տակ²⁶, նրա սահմանները (գլխավորապես արևմուտքում և հյուսիսում) ավելի ընդարձակ պետք է լինեին, քան էին Տիգրան Բ-ի ժամանակաշրջանում, Բացի Մեծ Հայքից այն պարունակելու էր նաև «...զմասն ինչ յարեմտեայ Ասորոց և զՊաղեստին և զԱսիա և զամենայն Միջերկրեայս և զԹեոտալիա, ի ծովէն Պոնտոսի մինչև ի տեղին՝ ուր, Կաւկաս յարեմտեանն յանգի ի ծով, և զԱտրպատական»²⁷,

Անանունից հայտնի հայ պատմական ավանդության համաձայն, Մեծ Հայքի գահակալին անմիջապես ենթակա երկրի համար Արշակ Մեծը (Վաղարշ Ա) հատել էր հետևյալ սահմանները. «...զԱրուաստան առ երկրան Տաճկաց եւ առ երկրան Ասորոց, և զԿապուտկեայ առ Կիւզիկեաւ, մինչեւ ցեղը ծովուն մեծի արեմտից. եւ ցհիւսիսոյ կողմանէ ի լիառն մեծ Կովկաս, որ ձգի ընդ կողմանս արեւելից եւ անցանէ առ սահմանան առ ամուր աշխարհան Մարաց, եւ հասանէ ի լիառն Զարասպ, եւ անցանէ առ Նոր Շիրակ երկրան»²⁸,

Ինչպես տեսնում ենք, հակառակ Հռոմի, որն աշխատում էր ամեն կերպ կրճատել Մեծ Հայքի տարածքը, նրան ղրկել փոքրասիական և կովկասյան սահմաններում ունեցած իր պաշտպանական բնագծերից, Վաղարշ Ա-ն ձեռքտոմ էր ընդարձակել նրա սահմանները ի հաշիվ նրա արևմտյան (փոքրասիական) ու հյուսիսային (կովկասյան) հարևանների և, դրանով իսկ, լրացուցիչ պատմարներ ստեղծել մի կողմից Մեծ Հայքի ու Հռոմեական կայսրության, մյուս կողմից՝ նրա ու «հյուսիսականների» միջև։ Սա մեկն էր այն գլխավոր պատճառներից, որոնք մ. թ. I դ. կեսից սկսած շահերի զուգադիպության հողի վրա Հայաստանում ի մի էին ձուլել հայրենասեր և պարթևասեր կուսակցությունները՝ հայ հասարակության բոլոր խավերի մեջ Արշակունիների կողմնակիցների համար ապահովելով բացարձակ մեծամասնություն։

Արևմուտք վերադառնալուց հետո Վաղարշ Ա-ն իր բանակը բաժանել էր երկու մասի. մեկը իր զորավար Մոնեսի (Մանեճ) և Ադիաբենեի թագավոր Մոնոբազ (Մանավաղ) Բ-ի հրամանատարությամբ ուղարկել էր Հայաստան՝ Տրդատին հայկական գահին վերահաստատելու համար, իսկ մյուսը իր հետ տարել դեպի Ասորիք, Կորբուլոնը Տիգրան Զ-ին օգնության ուղարկելով ևս երկու լեգեոն, հռոմեական մնացած զորքով ամրացել էր Օփրատի ափին, որպեսզի արգելի պարթևական բանակի մուտքը Ասորիք²⁹, իսկ Տիգրան Զ-ն, խուսափելով ճակատամարտից, հռոմեական լեգեոնների հետ միասին փակվել էր պարթևա-հայկական դաշնակից ուժերի կողմից պաշարված Տիգրանակերտում³⁰, Կորբուլոնը հասկանալով, որ ապագան Հռոմի համար ոչ մի լավ բան չի խոստանում՝ հանդես էր եկել բանակցություններ սկսելու առաջարկով։ Վաղարշն ընդառաջել էր և համաձայնել ռեպուբլիկանական ուղարկել կայսրի մոտ, որպեսզի Հայաստանն իրեն տրվի և հաշտություն կնքվի Մոնեսին նա՝ հրամայում է թողնել Տիգրանակերտը, ինքը ևս ետ է քաշվում³¹,

²⁶ «Հայ ժողովրդի պատմություն», հ. I, էջ 746:

²⁷ Մ. Խորենացի, էջ 29:

²⁸ «Սեբեոսի եպիսկոպոսի պատմություն», Երևան, 1939, էջ 9:

²⁹ Tac., Ann., XV, 4—5; Cass. Dio, LXII, 20.

³⁰ Tac., Ann., XV, 4—5.

³¹ Նույն տեղում, 5:

Միաժամանակ ռազմական գործողությունների երկկողմանի դադարեցումից և Վաղարշի հեռանալուց հետո, Տիգրանը նույնպես պետք է թողներ Հայաստանը³²։

Վաղարշի առաքած դեսպանները Հռոմից վերադարձել էին ձեռնունայն, ներոնր որոշել էր հայկական հարցը լուծել Հայաստանը հռոմեական պրովինցիա դարձնելու միջոցով։ Այդ նպատակով նա 61 թ. Հայաստան ուղարկված հռոմեական բանակի զխավոր հրամանատար էր նշանակել Կեսենիոս Պետոսին, որը, սակայն, Հռանդեայում պարթևա-հայկական ուժերի կողմից 63 թ. պաշարվելուց հետո, ստիպված էր եղել հանձնել գրաված բոլոր ամրությունները, ամբողջ զենքը, գերիներին, ավարն ու պարենը և հեռանալ Հայաստանի սահմաններից³³։ Այս բանը ներոնին ստիպել էր փոխելու իր քաղաքականությունը հայկական հարցում։ 64 թ. կրկին Հայաստան ժամանած Կորբուլոնը հասել էր պարթևա-հայկական կողմի համաձայնությանը, որ «Տրդատը կայսեր արձանի մոտ դնի թագավորական նշանը և ետ վերցնի միայն ներոնի ձեռքից»³⁴։ Հաջորդ տարի Տրդատը ուղևորվել էր Իտալիա, որտեղ ներոնի ձեռքով թագադրվելուց հետո՝ 66 թ. վերադարձել էր Հայաստան։

Հռոմի կողմից Տրդատի ճանաչումը որպես Մեծ Հայքի օրինական գահակալ՝ նշանակում էր Հռոմի հրաժարումը ինչպես Մեծ Հայքի գահի, այնպես էլ նրա տարածքի այս կամ այն մասի նկատմամբ ունեցած հավակնություններից։ Հռոմի փոքրասիական և կովկասյան վասալներն ու դաշնակիցները այժմ ստիպված էին հրաժարվել Մեծ Հայքի սահմանամերձ շրջանների նկատմամբ իրենց տրված ձեռնարկներից³⁵։ Ըստ այսմ, Մեծ Հայքին պետք է վերադարձվեր ոչ միայն Ծոփքը, այլև Փոքր Հայքին, Պոնտոսին, «Հենիոխների և մաքելոնների թագավորությանը», մոսխերին և Վիրքին անցած հայկական շրջանները՝ Եկեղիքը (Ակիլիսենեն), Սպերը, Տայքը, Խորձենեն և Գուգարքը։ Իրանցից վերջին երեքը վերադարձնելիս Տրդատ Ա-ն մասամբ դուրս էր մղելու, մասամբ իրեն էր ենթարկելու տեղերում հաստատված հենիոխների, մաքելոնների, մոսխերի և «հյուսիսականների» հրոսակախմբերը։ Ըստ երևույթին, նա այդ գործին ձեռնամուխ էր եղել նախքան 65 թ. վերջին թագադրության համար Հռոմ մեկնելը։

Տրդատի այս գործողությունների վերաբերյալ ուշադրության արժանի վկայություններ կան պահպանված Մովսես Խորենացու «Հայոց պատմության» մեջ։ Նկարագրելով Մորփյուղիկի գործերի կրած պարտությունը Վաղարշակի պարթևա-հայկական ուժերից³⁵, մեր պատմահայրը «Եթէ որպէս կարգեաց Վաղարշակ զարեւմուտս եւ զհիւսիսի մերոյ աշխարհիս» վերնագրի տակ շարունակում է. «Եւ այսպէս կատարեալ՝ կարգէ զկողմանս Մաժաբայ եւ զՊոնտացիս եւ զԵգերացիս. դառնայ զհիւսիսեալ առ ստորոտովն Պարթարայ ընդ մէջ Տայոց, ի գիշին եւ ի մառախլուտ տեղիս մայրեաց եւ ի լօռաւէտս... Եւ աստ կոչեցեալ զվայրենի եկամուտ ազգն, որ ի դաշտին հիւսիսոյ եւ որ զստորոտով մեծի լերինն Կաւկասոյ, եւ որ ի հովիտս կամ ի ձորս երկայնածիգս խորացեալս, ի լեռնէն որ զհարաւով՝ իջեալ մինչ ի դաշտաբերանն մեծ. պա-

³² Նույն տեղում, 6։

³³ Նույն տեղում, 14։

³⁴ Նույն տեղում, 29։

³⁵ Մ. Խորենացի, էջ 107։

տուէր տալով զաւագակութիւն եւ զմարդադաւութիւն ի բաց քեցել յինքեանց, եւ հրամանաց եւ հարկաց արքունի հպատակ լինել։ որպէս զի միւսանգամ տեսեալ զնոսա՝ առաջնորդս եւ իշխանս հանդերձ գեղեցիկ կարգաւ հաստատեսցէ։ Եւ արձակէ զնոսա հանդերձ արամբք իմաստնովք եւ վերակացուօք յիրմէ։ Եւ ինքն արձակեալ զարեւմտեայ բազմութիւնն՝ իջանէ ի տեղիս խոտաւէտս մերձ ի սահմանն Շարայի։ զոր հինքն Անփայտ և Վերին Բասեան կոչէին...»³⁶,

Ըստ երևույթին, նույն այդ ժամանակ Տրդատ Ա.-ի թագադիր և զորահրամանատար Շամբատ Բագարատը (Սմբատ Բագրատունին) փորձ էր արել վերադարձնելու նաև Մեծ Հայքի նախկին հյուսիսային կուսակալութիւնը՝ Գողերձականը, որը բնակեցված էր մոսխերով և Վիրքի գերիշխանութիւնի տակ էր դրվել համաձայն 37 թ. հռոմեա-պարթևական պայմանագրի³⁷։ Նախ, այս Շամբատ Բագարատի մասին, Ըստ Մովսես Խորենացու, Արշակունի արքայատոհմի հայկական ճյուղի ավանդական հիմնադիր Վաղարշակը (Տրդատ Ա) գահ բարձրանալով «... նախ եւ առաջ փոխարեն բարեաց հատուցանելով առնն զօրաւորի եւ իմաստնոյ, որ ի Հրէիցն՝ Շամբատայ Բագարատ. տալով նմա իշխանութիւն ազգաւ թագադիր լինել Արշակունեաց. եւ որ ի նմանէ ծնեալ ազգ՝ լինել կոչմամբ յանուն նորա Բագրատունի, որ է այժմ մեծ նախարարութիւն ի մէջ աշխարհիս։ Քանզի այս Բագարատ նախածեռն ընծայ ըստ կամաց մատոյց զինքն Վաղարշակայ յառաջ քան զպատերազմունսն Արշակայ ընդ Մակեդոնացիսն, եւ սա ի դրան արքունի։ Իսկ ի ծայրս հայերէն խօսից կողմնակալ, իշխան բիւրոց եւ հազարաց, յարեմտից կուսէ»³⁸։

Այս նույն անձնավորութիւն վերաբերյալ Ս. Երեմյանը գրում է. «Մովսես Խորենացու մոտ հայտնի Շամբատ Բագարատը (Անանունի Բագարատ Փառազյանը) ժամանակակից էր Վաղարշ Ա.-ին և Տրդատ Ա.-ին, և Ադիաբենի թագավորներին հետեւելով, ընդունել էր հրեական կրոնը (ավելի ճիշտ՝ նախնական քրիստոնեութիւն ուսմունքներից մեկը)։ Ինչպես երևում է, այս Բագարատը պարթևներին կողմնակից հայ մեծամեծներին (Μεγαλειότητες) էր գլխավորում և նրանց հետ միասին պայաստան էր գտել Մծբինում։ Անանունի տեղեկութիւններից ակնհայտ է դառնում, որ Բագարատ Փառազյանն (ըստ Խորենացու՝ Շամբատ Բագարատը), իբրև հայ ավագանու ներկայացուցիչ և պարթև Արշակունիների արքունիքի ամենամոտ և հավատարիմ անձնավորութիւններից մեկը, մասնակցում է Տրդատին Մեծ Հայքի թագավոր հռչակելու արարողութիւններին, հանդես գալով իբրև թագադիր-թագակապ»³⁹։

Ըստ Մովսես Խորենացու, Շամբատ և Սմբատ անունները նույնական են⁴⁰։ Եթե այդպես է, ապա, իսկապես, Շամբատ Բագարատը նույն Սմբատ Բագրատունին է՝ «Քարթլիս ցխովրեբայի» Սումբատ Բիվրիատիանը։ Ի դեպ, վերջինս Սմբատի հայրանունն է, որովհետև, ըստ Խորենացու, նրա հորը կոչում էին Բյուրատ (գրաբ. Բիւրատ)։ Այստեղից էլ Սմբատ Բագրատունու Բյուրատյան հայրանունը (գրաբ. Բիւրատեան)՝ մոռց. Բիվրիատիան)։

³⁶ Նույն տեղում, էջ 108—109։

³⁷ «Հայ մողովրդի պատմութիւն», հ. I, էջ 720։

³⁸ Մ. Խորենացի, էջ 104—105։

³⁹ «Հայ մողովրդի պատմութիւն», հ. I, էջ 747։

⁴⁰ Մ. Խորենացի, էջ 196։

⁴¹ Նույն տեղում, էջ 162։

Ռազմական մեծ ուժերի գլուխ անցած Սմբատը մտել էր Վիրք։ Ինչպես «Քարթլիս ցխովրեբան» է վկայում, «... (նա) հաղթանակով մտավ Քարթլի, ավերեց (ամբողջ) Քարթլին բերդերից ու քաղաքներից զատ։ Իսկ բերդերի ու քաղաքների հետ չէր կռվում, քանի որ պատրաստ չէր՝ շտապ ելնելու պատճառով։ Նա մի բերդ կառուցեց Օձրխեում, որը Սամցխե է կոչվում, Դեմոթ անունով մի տեղում՝ Ղաղո լեռան կաած, թողնելով մեջը զորամաս՝ Մունգացվոց սգնության համար, քանի որ (ինքն) Օձրխեցվոց հետ կռվելու գնաց»⁴²։

Բերված հատվածում արձանագրված իրավիճակի համաձայն, Սամցխեն (Օձրխեն սրա մեզրելական անվանումն է)⁴³, այսինքն՝ մոսխերի երկիրը, թշնամաբար էր տրամադրված հայոց գահակալի նկատմամբ։ Իսկ դա ավելի բնորոշ է 37 թ. հաջորդած (քան թե նախորդած) ժամանակաշրջանի համար, երբ այս երկրամասը (նախկին Գողերձական կուսակալությունը) անջատվելով Մեծ Հայքից, դարձել էր հռոմեա-վրացական կողմի ամուր հենարանը հայերի և պարթևների դեմ՝ մանավանդ 57—59 թթ. Կորբուլոնի արշավանքի ժամանակ։

Այսուհանդերձ, բացառված չէ, որ վերոբերյալ հատվածում (և ընդհանրապես Սմբատ Բագրատունու վերաբերյալ մեզ հասած տեղեկությունների մեջ) ի մի են ձուլված ինչպես Տրդատ Ա-ի, այնպես էլ Արտաշես Ա-ի (189—160 թթ. մ. թ. ա.) ժամանակաշրջանի դեպքերի նկարագրությունները։ Պատճառը կարող էր լինել թե՛ այն, որ հայոց այս երկու թագավորներն էլ կրել են միևնույն Արտաշես գահանունը⁴⁴, թե՛ այն, որ նրանք երկուսն էլ իրենց ժամանակին ռազմական գործողություններ էին ծավալել Մեծ Հայքի այդ նույն ծայրամասերում։ Հիշենք, որ Մեծ Հայքի հյուսիսային ծայրամասերը՝ Պարիադրեսի լեռնալանջերը, Խորձենեն և Գոգարենեն, ըստ Ստրաբոնի, հայոց Միջնաշխարհին էր միացրել Արտաշես Ա-ն⁴⁵, իսկ Տրդատ Ա-ի օրոք դրանք վերամիավորելու անհրաժեշտություն էր ստեղծվել։

Մեծ Հայքի նախկին հյուսիսային կուսակալությունը՝ Գողերձականը, վերադարձնելու նպատակով Սմբատ Բագրատունու (Սմբատ Բյուրատյան) թափած ջանքերը հաջողությամբ չէին պսակվել։ Դա պարզ երևում է դեպքերի հետագա ընթացքից։ Հայտնի է, որ մ. թ. 75 (կամ 74) թ. տեղի էր ունեցել ավանների գլխավորած «հյուսիսական», հրոսակախմբերի հերթական ներխուժումը Անդրկովկաս⁴⁶։ Դարիալի և Վիրքի վրայով տեղի ունեցած այս ներխուժման ժամանակ «հյուսիսականները» ավերի ու ավարի էին մատնել նաև Վիրքը և «... ինչպես երևում է, թշնամուն դիմագրելիս, ընկել է կռվի դաշ-

⁴² Լ. Մելիքսեթ-Բեկ, Վրաց աղբյուրները Հայաստանի և հայերի մասին, հ. I, Երեվան, 1934, էջ 157։

⁴³ Ս. Ս. Երեմյան, Հայաստանը ըստ ռազմաքաղաքական-ի, Երևան, 1963, էջ 79։

⁴⁴ Այդ առթիվ տե՛ս Ա. Գարադաշյան, Քննական պատմություն Հայոց, մասն Բ, Բիֆլիս, 1895, էջ 242—250, Н. Адонц, նշվ. աշխ., էջ 432, Հ. Մանսդյան, Քննական տեսություն հայ ժողովրդի պատմության, հ. Ա, էջ 353, հ. Բ, մասն Ա, Երևան, 1957, էջ 12—14, Մ. Աբեղյան, Երկեր, հ. Ա, Երևան, 1966, էջ 122—123, Գ. Խ. Սարգսյան, Հելլենիստական դարաշրջանի Հայաստանը և Մովսես Խորենացին, Երևան, 1966, էջ 149—150, 182։

⁴⁵ Strabo, XI, 14, 5.

⁴⁶ Cass. Dio, LXVI, 15, 3; Suetonius, Domitianus. II.

տում Փարսման Ա թագավորը»⁴⁷, Ըստ երևույթին, ալանները վերջին համար-
ձակ քայլին դիմելիս օգտվել էին 70-ական թվականների կեսին վրացա-հո-
մեական փոխհարաբերություններում առկա լարվածությունից: Հոռմը Վիրքի
ուժեղացմամբ շահագրգռված էր այնքանով միայն, որքանով որ նրա գահա-
կալները կշարունակեին մնալ իր հլու-հնազանդ կամակատարները: Վերջին-
ներիս կողմից կայսրության շահերն անտեսող ինքնուրույնության որևէ դրսե-
վորում Հոռմում զնահատվում էր որպես թշնամական քայլ: Եվ կայսրությունը
էր հապաղում իրականացնելու իր հակաքայլը՝ երկրում երկպառակության
սերմանումը՝ նրա ուժերը ներսից ջլատելու միտումով⁴⁸:

Վրացա-հոմեական փոխհարաբերություններում առկա լարվածությունը,
հավանաբար, գոյություն ուներ 60-ական թվականների կեսից սկսած: Նրա
զխավոր պատճառը պետք է լինել այն ինքնուրույնությունը, որ ցուցաբերել
էր Փարսման Ա-ն Արշակունիների և Հայաստանի հետ: իր փոխհարաբերու-
թյունները կանոնավորելու հարցում: Ըստ երևույթին, երբ Սմբատ Բագրա-
տունու (Սմբատ Բյուրատյան) զորքերը բուն Վիրքը ասպատակելուց հետո
ներխուժել էին Սամցխե (Օձրախե) այն Մեծ Հայքին վերադարձնելու ակնկա-
լությամբ, Փարսմանը ստիպված է եղել հաշտություն խնդրելու: Ամենայն
հավանականությամբ, հաշտությունը կայացել էր նախկին Գողերձական կու-
սակալությունը Վիրքի պերիշխանության տակ թողնելու հայկական կողմի հա-
մաձայնությամբ՝ Հայաստանը արշավող «հյուսիսականների» դիմաց Դա-
րիալը (հնարավոր է նաև հարևան մյուս լեռնանցքները) փակելու վրացական
կողմի ստանձնած պարտավորության դիմաց:

«Հյուսիսականների» 75 թ. արշավանքի ժամանակ հայ-վրացական բարի-
դրացիական փոխհարաբերությունների գոյությունն է արձանագրել «Պատմու-
թիւն Տարօնոյ» երկից քաղված հետևյալ հատվածը. «Արքայն հիւսիսոյ զօր
գումարեալ եկն ի վերայ իշխանին վրաց. եւ զնա փախստական արարին, բե-
րին մինչեւ ի Կարնոյ քաղաք. եւ զերկիրն գերի վարեալ տարան ոգիս իբրեւ
քառասուն եւ ութ ռ: Արդ իբրեւ հհաս պատգամաւորն վրաց իշխանին առ թա-
գաւորն Տրդատ եւ զօր խնդրել իւր յօգնականութիւն: Եւ թագաւորն տուեալ
լի ի ձեռս իշխանին Ապահունեաց եւ արձակեաց յօգնականութիւն վրաց իշ-
խանին»⁴⁹: Ինչպես այս հատվածը, այնպես էլ «հյուսիսականներին» վերա-
բերող «Տարոնի պատմության» պահպանած տեղեկությունների սովոր մասը
առնչվում է Տրդատ Ա-ի օրոք տեղի ունեցած նրանց ներխուժումներին, շնա-
յած հետագա շարադրանքում առկա են նաև հաջորդ ներխուժումներին վերա-
բերող ինչ-ինչ դրվագներ⁵⁰:

Այսպիսով, շնայած այն բանին, որ մ. թ. 37 թ. Մեծ Հայքի կազմից հան-
ված նրա հյուսիսային և հարավ-արևմտյան ծայրամասերը (Գողերձական
կուսակալությունը և հյուսիսային Միջագետքը) այդպես էլ մնացին Արշա-
կունյաց Հայաստանի սահմաններից դուրս, այնուամենայնիվ, Տրդատ Ա-ի

⁴⁷ «Հայ ժողովրդի պատմություն», հ. I, էջ 768:

⁴⁸ Г. А. Мелikian, К истории древней Грузии, Тбилиси, 1959, էջ 341:

⁴⁹ «Պատմութիւն Տարօնոյ», Երևան, 1941, էջ 117—118:

⁵⁰ Խոսքը վերաբերում է հատկապես «հյուսիսականներին» մինչև Տարոն հասնելու և Աղձ-
նեաց բղեշխի դավաճանության դրվագներին (տե՛ս Մ. Աբեղյան, Երկեր, հ. Ա, էջ 300,
հ. Գ, Երևան, 1968, էջ 451):

կողմից վերստին հայկական թագավորության մեջ էին ընդգրկվել ինչպես գրանցից առաջ անջատված Կասպքը (տրեկլքում) և գրանից հետո անջատված Մոփքը (արևմուտքում), այնպես էլ Կորրուլոնի 57—59 թթ. հայկական արշավանքի ժամանակ բռնի կերպով Մեծ Հայքի կազմից հանված և Հռոմի կամքով հարևան թագավորների ու ցեղերի անօրինությանը հանձնված նրա հյուսիս-արևմտյան և հյուսիսային ծառայատեղեր՝ հին Եկեղիքը (Ակիլիսենն), Սպկրը, Տալքը, Խորձենեն և Գուգարքը:

СЕВЕРО-ЗАПАДНЫЕ И СЕВЕРНЫЕ СОСЕДИ ВЕЛИКОЙ
АРМЕНИИ В СФЕРЕ АРМЯНО-РИМСКИХ ВЗАИМООТНОШЕНИИ
(третья четверть I в.).

САРГИС ПЕТРОСЯН

Резюме

Осуществление своей политической программы окончательного разрешения армянского вопроса Нерон (54—68 г. н. э.) начал с того, что в пограничных странах Великой Армении усилил проримские элементы. Затем римские и союзные силы в 57 г. стали продвигаться в глубь Армении. В конце концов Тиридат I (54—80, официально с 66 г. н. э.), претендовавший на армянский престол, был вынужден удалиться из Армении. Тогда же северные и северо-западные районы (т. е. древняя Акилисена, Спер, Тайк и Гогарена с Хордзеной) вышли из состава древнеармянского государства. Таким образом, римляне лишили Армению защитных рубежей в горах Гогаренско-Хордзенских и в хребтах Пархарско-Понтийских. Переход этих районов к союзникам-вассалам римлян (царям Малой Армении, Понта, «гениохов и махелонов» и Иберии) предоставлял Риму возможность усилить давление на Великую Армению также с северо-запада и с севера. Когда парфяно-армянские союзные силы в 63 г. окончательно изгнали римлян из Великой Армении, Рим был вынужден признать Тиридата I законным властителем страны. После этого малоазиатские и кавказские союзники—вассалы римлян—вынуждены были отказаться от своих «прав» по отношению к пограничным районам Великой Армении.